



Broj/Broj: 01/4-50-1-4-6/07
Sarajevo/Sarajevo, 24.4.2007. godine

Z A P I S N I K

6. sjednice Komisije za finansije i budžet Predstavničkog doma Parlamentarne skupštine BiH,

održane 24.4.2007. godine, u vremenu od 10 do 12 sati

Sjednici su prisustvovali članovi Komisije: Sadik Bahtić, Drago Kalabić, Bajazit Jašarević, Velimir Jukić i Lazar Prodanović.

Iz opravdanih razloga sjednici nisu prisustvovali Savo Erić i Zlatko Lagumdžija.

Sjednici su prisustvovali poslanici i pozvani predstavnici institucija:

- poslanik Jozo Križanović, u svojstvu predlagača zakona;
- Miroljub Krunić i Biljana Tabaković iz Ministarstva finansija i trezora BiH;
- Kemal Kozarić, guverner, i Jasenka Žigić iz Centralne banke BiH;
- Haris Bašić, član UOUIO;
- Elma Kadić, savjetnik, i Amila Ibrahimović, saradnik u Misiji OSCE-a u BiH;
- Dragica Hinić, privremeni sekretar Komisije za finansije i budžet i
- Alma Mijić iz INDOK-a PSBiH.

Sjednici je predsjedavao Sadik Bahtić, predsjedavajući Komisije.

Za sjednicu je predložen sljedeći

DNEVNI RED

1. Usvajanje zapisnika 3. i 4. sjednice Komisije za finansije i budžet;
2. Razmatranje Prijedloga zakona o izmjenama i dopunama Zakona o PDV-u (predlagači: poslanici Zlatko Lagumdžija, Jozo Križanović i Selim Bešlić);
3. Razmatranje Prijedloga zakona o okviru deviznog poslovanja u BiH- prva komisijska faza (predlagač: Vijeće ministara BiH);
4. Razmatranje Godišnjeg izvještaja Centralne banke BiH za 2006. godinu (sačinilac: Centralna banka BiH);
5. Razmatranje finansijskih izvještaja Centralne banke BiH za 2006. godinu (sačinilac: Centralna banka BiH);
6. Razmatranje Izvještaja o poslovanju Ureda za reviziju finansijskog poslovanja institucija BiH za 2006. godinu (sačinilac: Ured za reviziju finansijskog poslovanja institucija BiH);

7. Tekuća pitanja:

- a) poziv za učešće na Radionici o internoj reviziji, koja će biti održana 23. maja 2007. godine u Sarajevu.

Predloženi dnevni red članovi Komisije usvojili su jednoglasno.

Ad.1. Usvajanje zapisnika 3. i 4. sjednice Komisije za finansije i budžet

Zapisnike 3. i 4. sjednice članovi Komisije jednoglasno su usvojili.

Ad.2. Razmatranje Prijedloga zakona o izmjenama i dopunama Zakona o PDV-u (predlagači: poslanici Zlatko Lagumdžija, Jozo Križanović i Selim Bešlić)

Jozo Križanović obrazložio je Prijedlog zakona o izmjenama i dopunama Zakona o PDV-u, čiji je predlagač Klub poslanika SDP-a. Naglasio je da je intencija ovog zakona zaštita socijalno ugrožene kategorije stanovništva.

Sadik Bahtić istaknuo je da je Komisija razmatrala sličan prijedlog zakona i nije ga prihvatila. Smanjenje procenta od samo 1% dovelo bi do znatnog umanjenja postojećih prihoda, a nulta stopa pospješila bi sivu ekonomiju i utaje. Inače, ovaj prijedlog zakona razmatra se u skladu s odredbama ranije važećeg poslovnika.

Haris Bašić ukazao je na pravne nedostatke u Prijedlogu zakona. Tako se u članu 27. govori o nultoj stopi, dok se u drugom dijelu teksta govori o oslobađanju od plaćanja.

Istaknuo je da u UOUIO još uvijek nema raspoloženja za uvođenje diferencirane stope, odnosno uopće promjene postojećeg zakona, s obzirom da je znatno povećan broj budžetskih korisnika. Tek nakon tri godine moglo bi se eventualno razmišljati o izmjeni postojećeg zakona. Radi adekvatnog informiranja o cjelokupnom sistemu indirektnih poreza, predložio je održavanje sastanka Komisije s predstavnicima UOUIO.

Drago Kalabić istaknuo je da neće podržati Prijedlog zakona naglašavajući da je neophodno sačiniti suštinsku analizu prihoda od PDV-a i mogućnosti njihove raspodjele.

Velimir Jukić saglasio se s prijedlogom o organiziranju sastanka članova Komisije s UOUIO, na kojem bi oni prezentirali sve postignute rezultate, te dali viđenje sistema indirektnih poreza u narednom periodu.

Odlučivanje o principima Prijedloga zakona

Nakon rasprave, članovi Komisije, s pet glasova „protiv“, nisu usvojili principe Prijedloga zakona, predlažući i Domu donošenje takve odluke.

Ad.3. Razmatranje Prijedloga zakona o okviru deviznog poslovanja u BiH- prva komisijska faza (predlagač: Vijeće ministara BiH)

Miroljub Krunić obrazložio je Prijedlog zakona o okviru deviznog poslovanja u BiH, čiji je predlagač Vijeće ministara BiH. Osnovna intencija Zakona je da se uslovi deviznog poslovanja u BiH izjednače na cijeloj njenoj teritoriji. Istaknuo je da su za ovaj zakon pribavljena potrebna mišljenja entitetskih institucija, s tim da je naknadno dostavljen zaključak Vlade RS-a o povlačenju date saglasnosti na ovaj zakon, te pozivom da se ovaj zakon povuče iz parlamentarne procedure. Vlada RS-a stoji na stanovištu da Prijedlog zakona suviše široko definiše ovu oblast i dijelom zahvata i poslove koji su u nadležnosti entiteta.

Drago Kalabić naglasio je da nema potrebne saglasnosti Vlade RS-a za ovaj zakon, te da bi raspravu o njemu trebalo odgoditi za narednu sjednicu Komisije kako bi se pokušalo naći kompromisno rješenje. U suprotnom, u slučaju izjašnjavanja na ovoj sjednici, Zakon neće biti usvojen.

Miroljub Krunic naglasio je da su tražene i dobivene saglasnosti ministarstva finansija oba entiteta. Od ovih ministarstava su, 24.1.2006., dobivena mišljenja i komentari koji su potom ugrađeni u Prijedlog zakona. Zaključak Vlade RS-a dostavljen je nakon dostavljanja Prijedloga zakona u proceduru, sa zahtjevom da se ovaj zakon povuče.

Bajazit Jašarević smatra da će Vijeće ministara BiH zaista osigurati potrebne saglasnosti svih faktora kako bi se ovaj prijedlog zakona usvojio bez nepotrebne rasprave i gubitka vremena. I do sada je u proceduru dostavljano dosta prijedloga zakona koji nisu imali potrebne saglasnosti, te se na Domu vodila dugotrajna rasprava koja je rezultirala ponovnim vraćanje tih zakona Komisiji. Ubuduće ne bi trebalo tako raditi. U ovom slučaju predložio je donošenje sljedećeg **zaključka**:

„ Komisija je jednoglasna u mišljenju da bi bilo neophodno odvojiti određeno vrijeme za postizanje potrebne saglasnosti o Prijedlogu zakona, jer bi, u suprotnom, izjašnjavanje o Zakonu na ovoj sjednici, a potom i Domu, zbog jasno iskazanog stava pojedinih članova Komisije značilo gubitak vremena.

Zato Komisija zahtijeva od Vijeća ministara BiH da, zajedno s entitetskim resornim ministarstvima, učini dodatni napor na usaglašavanju Prijedloga zakona o okviru deviznog poslovanja u BiH, u roku od 15 dana.

Komisija moli Kolegij i Prošireni kolegij Doma da ima razumijevanja za ovakav stav i prolongiranje roka za odlučivanje o predloženom zakonu.“

Predloženi zaključak članovi Komisije usvojili su jednoglasno, nakon čega je završena rasprava o ovoj tački dnevnog reda.

Ad.4. Razmatranje Godišnjeg izvještaja Centralne banke BiH za 2006. godinu (sačinilac: Centralna banka BiH)

Kemal Kozarić obrazložio je kratko Godišnji izvještaj Centralne banke BiH za 2006. godinu. Istaknuo je da je inflacija u našoj zemlji ispod stope inflacije u eurozoni. Smanjen je trgovinski deficit, uspostavljen Centralni registar kredita za sva pravna i fizička lica u BiH, te dobiven novi kreditni rejting. Stanje u finansijskom i bankarskom sektoru u svakom pogledu bilježi napredak.

Nakon kraće rasprave u kojoj je istaknut izuzetan način rada Centralne banke BiH, članovi Komisije jednoglasno su prihvatili Godišnji izvještaj ove institucije za 2006. godinu te ga, predlažući Domu njegovo usvajanje, uputili u daljnju parlamentranu proceduru.

Ad.5. Razmatranje finansijskih izvještaja Centralne banke BiH za 2006. godinu (sačinilac: Centralna banka BiH)

Nakon kraćeg obrazloženja **finansijskih izvještaja Centralne banke BiH za 2006. godinu**, koje je dao **Kemal Kozarić**, članovi Komisije jednoglasno su prihvatili ove izvještaje i, predlažući Domu njihovo usvajanje, uputili ih u daljnju parlamentranu proceduru.

Ad.6. Razmatranje Izvještaja o poslovanju Ureda za reviziju finansijskog poslovanja institucija BiH za 2006. godinu (sačinilac: Ured za reviziju finansijskog poslovanja institucija BiH)

Kako na sjednici Komisije nije bilo ovlaštenog predstavnika Ureda za reviziju finansijskog poslovanja institucija BiH, članovi Komisije jednoglasno su odlučili da se rasprava o Izvještaju o poslovanju te institucije za 2006. godinu odgodi za narednu sjednicu Komisije. O takvom stavu bit će obaviještena navedena institucija.

Ad. 7. Tekuća pitanja

- a) poziv za učešće na Radionici o upravljanju javnim rashodima i finansijskoj odgovornosti , 23. maja 2007. godine u Sarajevu;
- b) poziv MMF-a za učešće na seminaru u Beču, od 28.maja do 1.juna 2007. godine.

a) Članovi Komisije jednoglasno su odlučili da se na Radionicu o upravljanju javnim rashodima i finansijskoj odgovornosti, koja će biti održana u Sarajevu 23. maja 2007. godine, upute Lazar Prodanović, Sadik Bahtić i Velimir Jukić.

b) Na poziv MMF-a za učešće na seminaru MMF-a za članove parlamenata iz BiH, u Beču od 28. maja do 1.juna 2007. godine, članovi Komisije jednoglasno su predložili Kolegiju da donese odluku o upućivanju Sadika Bahtića, predsjedavajućeg Komisije, na ovaj službeni put.

sekretar Komisije
Dragica Hinić

predsjedavajući Komisije
Sadik Bahtić